

JA MYÏDU'UKPÏ NØKY MIDI JA PABLO TYANÏGAJX JA TESALÓNIKÏT JAA'Y

Ku ja Pablo tnijayi pøn ja
nwindson'ajtim tjanchja'widip

1 Pablo ø nxøøw, jøts øø yam
nguejpxy ja nøky møøt ja
Silvano jøts møøt ja Timoteo,
jøts øøts ja ndaniguexy pøn jaty
tjanchja'widip ja Jesucristo yja' jam
Tesalónica kajpkøjxp, pøn møøt
amumjoojt t'etti ja Dios Teety jøts
møøt ja nwindson'ajtim Jesucristo.
Nay ja'ats amuum mgunuul'kxidip
jøts ja jotkujk'ajtin mmo'ojidit møøt
ja nwindson'ajtim Jesucristo.

Ku ja Tesalónikit jaa'y tyiktaañ ja
ejxpajt sa ja Dios yikjanchjawi

2Ejtp øøts ja Dios ndukmøjawi
ndukunuu'kxyjawi ku meets ja
xjanchjawi, jøts ku øøts ja Dios
n'ajot'aty ejtp mee nja'myech. **3**Ku
mee ngajpxpaaty ku øøts ja Dios
n'ajot'aty ka'ap øøts ja nja'dyigøy
ja m'øy'ajtindi, sa ja tsojkin ja
pa'ayo'owin xmøøt'atti, jøts sa ja
ajot'ajtin møk'ampy xjagyapti jøts
xjøp'ejxti ku mye'ent jadigojk ja
nwindson'ajtim Jesucristo. **4**Meets
migu'uktøjkti, pøn jaty ja Dios
janchja'widip, Dios mee mdsojkip
jøts nay ja' tø mwí'ijxyidi jøts

mee mnitso'ok'att. **5**Jade'en'ampy
øøts nnijawi ku øøts jam ojts ja
Dios y'øgyajpxy ja y'ømyadya'aky
ngajpxwa'kxiyi ma meets jam,
kidi øødsip ja ojts jade'en nugo
ngajpxy, pø jamxi ja Espíritu Santo
ja myøk'ajtin ja tmøødiyi jøts ja
jade'en wa'ats yiknijawit jøts ku
ja'abi kajpxy jøts ku ja'abi ayuujk
tyiyi yjanchi. Wa'atsxi xnijawidi
jøts ku øøts ja nduñ, kidi øødsip
ja kø'øm nadyamiduuñip pø
ja'agøjpxxi øøts ja nduñ jøts meets
ja xyiktu'unt.

6Ja Espíritu Santots mee
mmøøjyip ja xyondaajkin jøts
meets ejtni xoni xkupøkti ja Dios
y'øgyajpxy ja Dios y'ømyadya'aky
øy meets ja kawine'en tø
xkuwanjati. Xjats meets nayide'en
xuñ sa tø xpa'ejxti ku øøts ja ayo'on
nmidani midi ja nwindson'ajtim
tø ttunjøpi. **7**Xjats jade'en tø
mbidsømdi jøts ejxpajt mwa'andi
jøts ja mni'ejxu'udyidi niduki'iyi
pøn jaty ja Dios tjanchja'widip,
pøn jam tsinaadyip Macedoniit
jøts jam Acayit etjotp. **8**Jade'ents
idøøn ja Dios y'øgyajpxy ja
y'ømyadya'aky tø xyikwa'kxiyidi,
jøts kidi jamyip meets ja jade'en

nugo tø xuñ Macedonia uk jam Acaya, yiknija'wip yø o madsoo jøts ku meets ja Dios amuum xjanchjawi. Ti sa øø njaakwa'ant, ti øø njaaknikyajpx. ⁹Ja'axi ja kø'øm tmaryaktip jøts ku øøts jam ojts n'øch ma meets jam jøts y'øyja'widip ja' sa meets jam ojts xkupiky, jøts øy ja yikxon tnmadya'akti sa mee xmajstuufty ja'abi winmaa'n midi ja Dios kyaja'ajip, jøts ku ja Dios tu'ugyi tø xpabøjkpinaxwa'akti pøn xemikøjxp ejtp, pøn tu'ugyi Dios'ajtp. ¹⁰Jøts ñayiñimadyaktip ja nayide'en sa meets nwindson'ajtim Jesús xjøp'ixy jøts ku ja jadigojk wyimbett jap tsajpjøtpy ja Dios U'nk, pøn ja Dios Teety tyikniwaajts ja o'jkin jøts ja tyikjujkyjky. Ja'ats adøm idø'on xuknitso'ok'ajtindip ja' ayo'on midi memm midi wingomp.

**Sa ja Pablo kyajpxwa'kxy
jam Tesalónica**

2 Mnija'widipts migu'uk ja'adi, jøts ku øøts jam n'ats'øjch ma meets jam, ka'ap øøts ja nxøow nugo wyindigøøy. ²Øy øøts jam wyinaty Filipit kajpkøjxp tø nyikjemduñ, mnija'widipts ja wa'ats jøts ku øøts ja Dios tø xjanchpudøki jøts øøts ja kyajpxy jøts øøts ja y'ayuujk ja tø nyiknajxiyi amumjoojt midi xyiknitso'ok'ajtindip, jøts meets ja tø myiktukmadøy yam idø'on ja tsep yjanchjatuñi. ³Jøts ka'ap øøts ngajpxigøy ti jaty øøts ojts ngajpxwa'kxy, jøts kidi wenk winmaa'nip øø njagyeypy ku øøts jam jade'en ojts ngajpxy jøts nika' myikwin'øøndi. ⁴Pø tiy'ajtinxi

yø', tøxi ja Dios kø'øm tyikutuky jøts øøts ja tø xanipiky ja kyajpxy ja y'ayuujk midi yiknitsokp, jøts jade'ents øøts ja tø ngajpxnaxy. Jøts ni ka'ap øøts ja n'ixa'ay jøts øøts ja kuwani ndyimyikta'øy'ext uk ndyimyiktakajxa'akt, pø ja Diosxi yikmidump jøts ja'ats tu'uk tu'uk t'ejxp sa jaty pøngapøn yjaa'y'aty. ⁵Jøts mnija'widipts ku øø ka' nugo ngajpxy sa jaty ojts myiknøjmidi jøts nigidi taayip øø n'ixaapy sudso øøts ja meen nbøkt. Ja Dios yø tnija'wip jøts ja' yø t'ejxp. ⁶Niwindii øø ngawa'añ jøts øøts ja jaal'y xwindsø'øgit, wan meedsi uk øy tyimyjapøni. Xpaat'ajtpimts øøts, øy øøts ja jeexyip jade'en tø nduñ jøts meets jeexyip ja nwindson'ajtim Jesús kyutujk møk'ampy tø ndanipiky, pø ja'axi øø nbadumpy. ⁷Ka'ap øøts jade'en tø n'adi'ich; øy yikxon mee tø nmiyuyj'aty sam ja u'nktaak tyikyeeky tyiktsø'øky uk t'ejx'ity ja y'u'nk ja y'una'jk. ⁸Njanchøjkpy meets mjanchpa'ayøøpy meets, jade'en pyaat'aty jøts øøts jeexyip ka'ap ja Dios kyajpxy ja'ayi nugo tø nyajkiyi, ngu'o'jkippaat meets jeexyip ja'agøjxp ku ndsokti ja'agøjxp ku nba'ayowdi. ⁹Mee migu'uktøjk, wa'ats inet xja'myatsti sa øøts y'lijty nduñ nbiky, sa øøts nnamyiwinmaa'mbyaadyi jøts øø nbaaty ja nidsinaajyik. Ku øø nduñ xinaxy tsunaxy, ngamaa'y nga'lity øøts, jøts jade'en ka'ap myik'adsepti ku myikmo'odi jade'en ja Dios y'øgyajpxy ja Dios y'øy'ayuujk. ¹⁰Mee nagyø'øm mnija'wip jøts møøt ja Dios, jøts ku ka' ti tundigø'øyin myiktu'unxidi.

Yikxon øø njaa'y'aty jøts øøts jade'en ka' ti pøky xaja'aty øy øø pøn xjapøky'ejxwa'añ. ¹¹Jøts mnayi mnija'widip nayide'en sa nidu'uk jaty tø myik'ayo'ejxti ku myikajpxjot'amøjkidi, jade'en sam ja jaa'y ja tyeety yjagyepiyi. ¹²Tøxi myiktukmadowdi jøts ku øy yikxon mjaa'y'attit sam pyaat'aty pøn ja Dios ja'ajtidip, pø ja'axi kø'øm wamp jøts meets ja mdaniwaadsowiyi ja kyutujktaajk ma ja amuum xyiktuujnidit ja myøk'ajtin, ja y'øy'ajtin jøts ja xyondaajkin.

¹³Ja'agøjxpts øøts idø'on ja Dios ja ndukmøjawi ndukunuu'kxyjawi ku meets ja kyajpxy ku meets ja y'ayuuujk ja ojts xmadøjiyi midi mee ndukmadoow. Ojts ja xjanchkupøkti jade'en jøts ku ja Dios ja tja'aji, kidi nugo jaa'yipxi ja' yja'. Jøts janch tiy janchts idø'on ja', jøts ku ja Dios ja tkajpxyi jøts ku ja Dios ja t'ayuuuji, jøts ja mbudøkiyidi pøn jaty ja tjanchja'widip. ¹⁴Mee migu'ukti, ku tø xku'ayo'ombaadidi ja Dios, kawine'en ja mmigugajp tø mdagubetyidi, nayide'en tø mjatti sam ja jaa'dyi pøn ja Dios tjanchja'widip pøn ja nwindson'ajtim Jesucristo tjanchja'widip pøn tsinaadyip jam Judea, pø nayide'enxi ja tø yjatti, nayide'en ja myi'israelit jaa'y ja kyamee'kxyidi. ¹⁵Yø'øbi israelit jaa'yts idø'on tyik'oo'ktøø ja nwindson'ajtim Jesús. Nayide'en ttungojmidi sam ja tø tyik'ookti ja kyø'øm migu'uk pøn jaty ja Dios kyugajpx'ajtpy, jøts øøts ja tø xpawøpy. Niwine'en ja Dios

ja tkayikjotkujk'atti jade'en, jøts yjanchtumwenk'ejxtip ja jaa'y øy pøn, ¹⁶jøts ku øøts ja Dios yja' njadukmadoowa'anmiyi pøn ka'israelit jaa'dyi jøts ja ñitso'oktit, ka'ats øøts ja jade'en xuktunwami. Xjats jade'en ja pyøky nugo tyikmiweni'adø'øtsti. Ixyamnimts inet ja Dios ja møk ayo'on tø tyuktagida'lagidi.

Ku ja Pablo øy tjapaatwa'añ jadigojk ja Tesalónikit jaa'y

¹⁷Mee migu'uktøjk, ku ojts nnawya'kxyindi jøts waani ñajxy ja et ja xøow, nja'myajts'ijtpyim meets øy mee njaga'ijxy jøts øøts njanchja'atsnøjkxwa'añ kawinaak ojk jøts mee n'ats'ext. ¹⁸Ojts øøts njadyimyja'uktsøøn; øts meets jam kø'øm kawinaak ojk tø njadyimy'ats'ejxwa'añ, jatyi jatyits øøts ja miku' xyiktuu'duky jøts øøts jam nganijxy. ¹⁹Jøts tigøjxp øø nxonda'aky, ti øøts idø'on ndaxondakpy, ti øøts idø'on njøp'ijxpy, ti øøts idø'on ndajotkujk'ajtpy, pø meetsxi dø'on ndajotkujk'ajtpy ku mye'ent ja nwindson'ajtim Jesucristo. ²⁰Meetsxi dø'on ndajotkujk'ajtpy ku øø nxonda'aky.

3 Jade'en'ampy øø tø nwinmay jøts øø nda'ant yam Atenas kajpkøjxp ku øø ka' n'ukmajada'kni, kumi ka' øø n'ukmidanaañi jadine'en ja jotmay, ²paty øø tø nguexy tu'uk ja nmigu'uk pøn jam tø m'ats'ijxyidi. Timoteo øøts nguexy, ja'axi ja Dios tmidump jøts ejtp øøts ja tø nmøøtuñ ku øøts ja nwindson'ajtim Jesucristo y'øgyajpxy ja y'øy'ayuuujk tø

ngajpxwá'kxiyi midí ja nitso'ok'ajtin tyajkp, ja'ats mdukmadowidíp jòts ja mgajpxjot'amòjkíyidít jòts ja m'ajot'ajtin tu'ugyi xyik'ettit, ³jòts jade'en ka' pòn t'ixmatst òy idò'on ja tsep jade'en y'ity. Wá'atsxi kò'òm xnijawidí jòts ku jade'en ja ayo'on nbaajtindít. ⁴Jòts ku òò nay jam wyinaty mòòt meets, ojtsxi òò nnigajpxy jòts mee ndukmadòy jòts ku n'amajajtindít ndsaachajtindít; tòts xnijawidí jòts ku jade'en tò yjanchjaty. ⁵Paty òts, kumi ka' òts jadine'en n'ukjotkujk'ajtni, ja'agòjxp mee tò ndaniguexy ja ja'a'y jòts ja tyiktò'tò sa ja mjanchja'win xyik'etti, ja'ats ò ndsò'jkíp uk wan meets ja miku' tò mduktuñidí ja yja' jòts jeexyíp ja Dios kyajpxy jade'en nugo ñiwyindigòy sa meets ja ojts njadukmadòy.

⁶Tòts ja Timoteo wyimbity jam Tesalónica jòts ja yam tò tmija'aty ja kajpxy ja ayuujk midí yikjotkujk'atyim jòts ku meets ja janchja'win mòj xjagyepy jòts xyiktuujnidí xem yam ja Dios chojkin. Yide'ents ja yam wya'añ jòts ku meets ejtp xja'myech, jòts ku nayide'en ja tsojkin xjagyajpti jòts òò xjapaatwa'añ nayide'en sam mee nja'ejxwami. ⁷Ñiyjot'amòkpòjpk òò migu'uk yjawi, ku òò nnimadòy jòts ku tu'ugyi ja Dios xjanchjawidí, yam òòts idò'on yjawi yide'en tsep'agujkpy njaty. ⁸Ku òòts jade'en nnimadòy jòts ku ja Dios tu'ugyi amumjoojt mòòt m'etti, jade'en òò nnayjawiyi tyimxyajimbejtp òòts yjawi. ⁹Ku meets jade'en xuñ, òy òòts ja Dios mòj njanchtamòjawi ku meets jade'en xpadundi ku jade'en xwindsò'ògidí ja Dios. ¹⁰Xjats òòts

yide'en xinaxy tsunaxy ja Dios n'amidòy jòts mee ndyimy'ats'ext, kò'òm ndyimy'atspaattit, jòts ka'pxy myiktukmado'odit ti jaty mjaaka'ejtxidíp jòts ja mjanchja'win tu'ugyi t'ettit.

¹¹Ja' òò ndsò'jkpy jòts òòts ja Dios Teety, jòts òòts ja nwindson'ajtim Jesucristo xpudòkit jòts òòts jam nnòjkt jòts jam m'atsyik'ejxtit.

¹²Nay ja Diosts myikmòjta'agiyidíp ja mwinmaa'ñ jòts ja tsojkin mòj xjagyaptit nixem niyam, jòts xminamyayidít òy pòn mòòt nayide'en sam mee myiktsoktin sam meets ja tsojkin ndamijagyapi.

¹³Nay ja Dios Teety mmo'ojidíp ja myòk'ajtin jòts xmidanidít ku sa mjattit, jade'ents ja mja'bikyidí jòts mgapòky'ijxyidí ku ja nwindson'ajtim Jesús jadigojk mye'ent mòòt niduki'iyi pòn jaty ja Dios ja'ajtidíp.

Sa ja Dios xajotkujk'ajtint

4 Ixyamts òò migu'uk nnigajpxy jòts mee myiktukmadowidí ja nwindson'ajtim Jesús y'ana'amingòjxp: jòts ku jade'en xun'ettit sa òòts ojts nyik'ixpiky jòts ku mdsòonidít mdanidít jade'en sa ja Dios ttajotkujk'aty. Tun'ettits meets ja jade'en.

²Mnija'widípxi ja ana'amin midí myikmòòdyi, midí òò tò nnigajpxy ku jade'en tyikutuky ja nwindson'ajtim Jesús. ³Ja' Dios chòjkpy jòts ja tu'ugyi xnadyamiyoxidít; jòts kidi nugo mnamyòòt'atyidí pòni ka'adam ja xniyaa'yidí pòni ka'adam ja xnidò'òxyidí, ⁴ku pòn y'amajtskiwya'añ, ka'ap ja patki'iyi

nipøn tø'oxyøjk tkamøøt'att. Ja' øy wə'ats pidsømp jøts ja jade'en kø'øm ñawyindsø'øgiyi. ⁵Jøts kidi nugo mbøkti ku mnachuj'ijxyidi ja'ayi sam ja jaa'y y'adi'ichin pøn ja Dios tkanija'wip. ⁶Kidi pøn ja myigu'uk ñidø'oxy twin'øø'nidi, møk nwindson'ajtim mdagubatidit, pø tøxi øø nnigajpxy. ⁷Ja'ats adøm ja Dios tø xanibiktaajka'am jøts adøm øy tsuj njaa'y'ajtindit. Ka'ap ja jade'en wya'añ ja Dios jøts ja kya'øybi ndu'unint. ⁸Jade'ents idø'on, pøni pøn yø'øbi ixpøjkin tkamøjpiktakp kidi myigu'ugip ja jade'en wyinaty tyumpy, ja Dios idø'on ja wyinaty jade'en kyamimadøøpy, pøn adøm ja y'Espiritu Santo tø xmø'øyim.

⁹Wine'en ja tsojkin wine'en ja namy'aayin xem yam, ka' øts ja ngajpxwa'añ. Ti ja øts ja nugo njaañit, pø tøxi Dios kø'øm mdukjatyidi jøts xem yam mnamyayidit mnachokidit. ¹⁰Ejtp meets ja mmigu'uk jade'en xminamyayi pøn ja Dios tjanchja'widip jam Macedonia. Ja'ayi ø nugo nnigajpxy jøts ja n'øyjaa'y'ajtin møk xjaakyik'awa'andit, jøts myøjit ja m'amigu'uk'ajtindi. ¹¹Øy jotkujk idø'on mdsøønidit mdanidit, ja mdunk ja mbøjk ja' idø'on mjotmay'attip pø jade'enxi øø nxumiwa'añ, ¹²jøts ja abikpyi jaa'y mwindsø'øgiyidit jøts kidi ti mga'ijtxyidi.

**Sə ja nwindson'ajtim
jadigøjk mye'ent**

¹³Mee migu'utøjk, ka'ap øø ndsøky jøts jadi'iñi mda'andit, ni

xkanijawidinim sə yjatt añmi'oo'kpi, jøts kidi jade'en mjotmay'ookti sam jadu'uk yjotmay'ooktin pøn ka' ti awejx'ajtin tjagyapti, pøn tkanija'widip ja Dios. ¹⁴Pøni nmibijkyimts adøm ja Jesús ku ja tø y'øøky jøts ku ja tø yjujkyiky jadigøjk, sudsots adøm ja ngamibøjkim jøts ku ja Jesús jadigøjk wyimbett ku ja Dios Teety ja møøt tyikjujkyøkt ja añmi'oo'kpi pøn jaty ja wyinaty tø y'atsjanchjawiyidi.

¹⁵Paty idø'on myiktukmadowdi nwindson'ajtim y'ixpøjkingøjxp, jøts ku adøm, pøn jaty wyinaty juky'ajtipnim ku ja nwindson'ajtim mye'ent, kidi adømip tyimyjawyenyoyojindip jøts nika'anin ja' pøn tø y'ookti. ¹⁶Pø kø'ømnimxi ja nwindson'ajtim kyida'akt jam tsajpjotp jøts ja kyajpxt kyutujkingøjxp, jøts ja kyajpxt sam ja møj ankilis, jøts ja pujxuujx ja tyiktu'unt midi ja Dios yja'ajtpy. Winetnimts ja yjujkyøktit jawyeen pøn tø t'atsjanchjawidi ja Cristo, pøn tø y'ookti tyigøydi; ¹⁷jøtsnim adøm pøn juky tandinim jaanimts adøm ja møøt nnøjxindit yootsjøtpy mə ja nwindson'ajtim nminabyaajtindit jam tsajpwemp. Jøts ja nwindson'ajtim jade'en xemikøjxp nmøøtjujky'ajtindit. ¹⁸Paty mjadyimñagyajpxjot'amøjkiyidit xem yam, yø'øbi kajpxy yø'øbi ayuujk myiktu'undip.

5 Migu'uktøjk, ka' chøkyi jøts ø nja'at ti xøøw ti jumøjt mye'ent ja nwindson'ajtim. ²Wə'atsxi meets ja xnijawi jøts ku ja nwindson'ajtim yja'att jotmøn

tu'ukpi xøow, yam ja wyinaty ka'ap pøn tjøp'ixy. Jotmøn ja mye'ent sam ja maa'tspi koots y'atsmiñ. ³Ku jaa'y wya'andit: “Jotkujk ixyam, ka' ti tyuñi, ka' ti kumay”, winets ja jotmøn tyaja'atpatidi jøts ja ayo'on myo'ojidit møk, jade'en tyaja'adidit sam ja tø'øxyøjk y'u'npikyin pøn ja y'u'nk tnikøjxp'ajtp jøts niwine'en ja chookin ja tkapaattit. ⁴Jøts meets migu'uktøjk, ka' meets mwimbeeds mgugoodsi. Me'emp ja juuni xøow ja nwindson'ajtim jøts ka' nugo jotkumoni mbaadiyidit ejxim ja jaa'y adsu'jky yikwimeech. ⁵Pø Diosxi mjagyajpidip jøts adøm wimbeets kugoots nga'ijtyindi. ⁶Paty ka'ap jade'en nugo njotmo'onindit sam jadu'ukpi y'adø'øtsta'an, njøp'ejxindip idø'on ja' wijy kejy. ⁷Pøn nugo najtspøki ejtp, ja wimbeets'ajtin ja kugoots'ajtin ja yikmajadakpy; jøts pøn mujkip kujxip, nay ja' ja yikmajadakpy. ⁸Jøts kujaji kudøø'kxi adøm, patyts adøm ejtp wijy kejy n'ejtindit. Kuwani njanchja'windit amumjoojt ja Dios yja' jøts nnachojka'andit nnamyajya'andit. Jade'en idø'on nnadyagubojka'andit ja Dios yja' ejxim ja soldadi ñadyagubøky'aan ja pyujx jøts ja nisa kyajaty. Jøts njøp'ejxindip adøm ja nitso'ok'ajtin, jade'en idø'on ja ñamyayi tpaaty sam ja soldadi pyujxkujup midi ja kyubajk ja adanaajyiyip. ⁹Pø kidi ja'ajixi adøm ja Dios tø xanibiktaajka'am jøts adøm n'ayo'ombaajtindit, pø ja'axi ja chøjkpy jøts adøm ja øy'ajtin nitso'ok'ajtin nbaajtindit nwindson'ajtim Jesucristo køjxp.

¹⁰Adømxi ja nwindson'ajtim Jesucristo tø xku'o'jkindi jøts adøm ja møøt njujky'ajtindit. Nbaajtimpxi ja' xemikøjxp øy njadyimyjajuky'ajtyindinim uk øy wyinaty tø njadyimya'o'jknandi. ¹¹Paty jotmøk mnabyikta'agidit jøts xem yam mnabyudøkiyidit sam ixa mmendi mbatti.

Ku ja Pablo ja jaa'y tkajpxwijy pøn tø tjanchjawidi ja Dios

¹²Migu'uktøjkti, ndukmadoodip ixyam jøts waani xwindsø'ogidit pøn ttundip ma meets jam, pøn jam nduu'møøjyidip, pøn jam mda'ana'amidip ja nwindson'ajtim yja'. ¹³Øy tsuj xaxonda'aktit ku jade'en tyundi, yiktundi ja tuda'aky'ajtin, yikxon namyiyujy'atidi nixem niyam.

¹⁴Jøts nayide'en migu'uktøjk ndani'ana'amdi, jøts xukja'gyukidit pøn katunwandip, kajpxjot'amøjkidi pøn yø'øbi tkadajotkukidi ku ja yikjemandi yiktedundi, pudøkidi pøn waani jot'amutsk'ajtpnim jøts tuda'aky mjaay'attit øy pøn møøt.

¹⁵Øyim mnay'ejxidit jøts kidi pøn nayide'en ttuñ ja myigu'uk sam ja tø kyayik'ødyuñin. Tum ja y'øybi ne'egi ejtp mdu'undip. Øy xwindsø'ogidit ja mmigu'uk nixem niyam jøts nayide'en øy pøn møøt.

¹⁶Øy jotkujk m'ettit. ¹⁷Ajot'at'etti ja Dios Teety. ¹⁸Pøni ti jaty tuujnip, tukmøjawidi tukunuu'kxyjawidi ja Dios, yø' ja Dios chøjkpy jøts meets jade'en xu'unt pøn jaty tjanchja'widip ja nwindson'ajtim Jesucristo.

¹⁹Kidi ja Espiritu Santo xyiktuu'dujkidi ja myøk'ajtin

midi meets ja mdunwa'anxiyip
 mjujuk'ajtingøjxp. ²⁰Jøts kidi
 xkagupøkti ja mmigu'uk pøn
 amuum kunuu'kxip ja Dios jøts
 ja tkajpxi ja Dios y'øgyajpxy ja
 Dios y'ømyadya'aky. ²¹Yikxon
 tuki'iyi x'uk'ejxtit, jøts midi øy,
 ja'ats mbaajtidip. ²²Ixmajtskøxti ja
 kya'øybi.

²³Jøts nay ja Dios, pøn ja
 jotkujk'ajtin tyajkp, nay ja' wa'ats
 myik'ejtxiyidip ja mjaa'y'ajtindi
 kunim ja nwindson'ajtim Jesucristo
 wyinaty myiñ. ²⁴Pø tøxi ja Dios
 mwi'ijxyidi, jøts tiy janch ja wya'añ
 jøts tuki'iyi ja jade'en ttungøxt sa ja
 tø wya'añ.

**Ku ja Pablo t'ukajxpoo'kxni
 ja myigu'uk**

²⁵Migu'uktøjkti, ni'amido'owik
 øøts, nibøktso'owik øøts.

²⁶Yiknajxidik øøts
 ngajxpoo'kxin jøts ja
 mmigu'uktøjk xkajxpoo'kxtit sam
 ja Dios tsøkyin.

²⁷Jøts nayide'en ndanipøkti
 Dios y'ana'amingøjxp, jøts ya'at
 nøky xukmado'odit niduki'iyi
 ja mmigu'uk pøn ja Dios
 tjanchja'widip.

²⁸Mgunuu'kxidip ja
 nwindson'ajtim Jesucristo. Jade'en
 idøøn ja yjatt.